

度

支

奏

議

度支奏議卷之二十九

新餉司目錄

題覆截漕運給薊永疏

覆東省留餉疏

覆川兵出關多支廩餉疏

議覆關寧補兵銀兩疏

覆津撫遣發援登兵馬併給餉疏

覆東撫議留在淮漕糧疏

覆京撫題議接濟島糧疏

奏報各處補兵銀兩疏

議覆撥登馬匹料草本折疏

覆川貴督撫分黔餉濟滇疏

覆津撫條議頒法馬立風信疏

議覆各倉改委有司收支疏

覆山永巡撫議逸營伍循環疏

覆關門建厰并議增腳價疏

查發新餉出入大數疏

會題東撫議運島餉疏

查覆關兵在薊行月兼支疏

議覆東省留餉准民間隨便輸納本色疏

覆津撫題請出海防汛兵餉疏

覆津撫條陳預備援兵行鹽事宜疏

覆關撫條議召買招練營米豆疏

覆津撫條陳召買考成疏

織覆永運委官高壘等減豁夫風米石疏

覆督撫題留裁冗襍項等銀疏

考覆閩外雷餉司疏

度支奏議卷之二十九

太子太保戶部尚書淄青畢自嚴視草

題覆截漕運給薊永疏

題爲預

請漕糧以濟軍需事該本部題專理新舊兩餉司案
呈崇禎五年正月二十四日奉本部送戶科抄
出監視薊鎮東協太監張國元題前事內開准
餉司羅應許手本會題前事准永平道手本燕
建二路通共主客軍兵額該本色或全給或半

給及營路單糧軍士蒙撫院定議經制無論上
下半年每名月給米三斗見今具題通共歲該
米九萬八千九百六十二石八斗又准關內道
手本內開山石二路通共主客軍兵額該本色
或全給或半給及單糧軍士蒙撫院議定經制
無論上下半年每名月給米三斗見今具題通
共歲額米一萬五千七百五十石八斗等因到
司准此案照永平被虜各倉如洗其防援兵馬
所需本色全藉遼糧爲接濟卽去歲民屯開徵

一半尚不足以供主軍之本色但今永關兩道
歲計所屬各營路提并調防兵馬共用米一十
一萬四千有奇雖蒙題借山海漕米萬石亦止
約供一月之需而嗷嗷之衆懸釜待哺合無請
乞如數撥派俟春和凍解早賜運發庶軍無枵
腹之虞等因到臣准此爲照永鎮空虛所需本
色更切各倉存積無餘目下支持惟有所借山
海萬石耳轉盼已空招買無出所仰藉于漕糧
者不啻然眉今春和凍解河道漸開若不先時

會計以所需之數入

告則部派無從據發此各道所以亟移餉司而羅應
許所以亟移會各部院而并移臣欲速題

請者也等因本年正月二十三日奉

聖旨該部酌議速覆欽此欽遵抄出到部送司又奉
本部送准山永巡撫丘禾嘉咨同前事內開正
月初九日准永平餉司手本會准永平道手本
開稱所屬臺頭等營路守提軍丁除尖夜補額
壯丁及臺正副烽軍俱各奉文加餉不給本色

外其餘軍丁六千四百四十六名正四兩月計
該本色米一萬五千五百二石八斗建燕臺界
四倉見任守支大使八員歲該米一百四十四
石調防官兵南兵中營團練中前營中左營忠
義右營團練前營二屯標後營標前營七營通
共兵丁六千一百七十七名歲該米三萬七千
六十二石又秦鎮川兵三千六百名奉文每名
該半本月米三斗歲該米一萬二千九百六十
石匡永山東本道標下兵丁共四千四百二十

六名每名該半本月米三斗歲該米一萬五千
九百三十三石六斗營路單糧軍士蒙撫院題
定經制冊內開四千六百三十五名無論上下
半年每名月給銀八錢米二斗并烽軍口糧歲
共該米一萬七千三百六十石四斗見今具題
以上通共歲該米九萬八千九百六十二石八
斗又准關內道會同前事內開山石二路守提
等臺軍丁除例支折色并尖夜臺正副烽軍俱
各奉文加餉不給本色外其餘見在單糧軍二

千五百四十七名蒙撫院定議經制無論上下
半年每名月給銀八錢米三斗歲該米九千一
百六十九石二斗雙糧家丁大砲百總共八百
五十一名正四兩月每名月支二石該米三千
四百零四石勇壯軍士四百六十一名歲該米
二千四百九十八石四斗烽軍五百六十六名
每年二三八四個月該支行糧米六百七十
九石二斗以上照新制共歲該米一萬五千七
百五十石八斗雖五年起徵秋時有待亦且不

足額兵正四兩月本色之數漕米之請刻不容
緩等因到司案照永平被虜各倉如洗防援兵
馬所需本色全藉漕糧接濟卽去歲民屯開徵
一半尚不足供主軍之本色但今永關兩道歲
計所屬各營路提并調防兵馬共用米一十一
萬四千有奇雖蒙題借山海漕米萬石止約供
一月之需山永兩道預議請發漕糧預備緩急
本司不敢擅便合無請乞如數派撥等因到院
爲照永關兩道所屬營路并調防兵馬歲需本色

不貲若不預請漕糧必致枵腹擬合咨請等因
到部又據永平餉司羅應許呈同前事等因到
部奉批新餉司查議奉此查得四年十二月內
該順天巡撫傅宗龍題爲酌議新舊兵餉之全
額定主客援守之成規仰請

聖裁以便責成綜核事題報酌定薊鎮新舊兵餉經
制并議歲截漕糧十萬石以給新兵緣繇本年
十二月初九日奉

聖旨着戶兵二部確議速覆欽此欽遵除經制見在

會同兵部商議另疏具覆外所有截漕一事相應併與酌議查得永鎮主客官兵并山海道所轄山石二路軍丁歲共該米一十一萬四千餘石未載新舊兵數今據巡撫丘禾嘉餉司羅應許各咨呈開列兵軍數目食米則例逐一打算內新餉兵該米六萬五千九百五十五石六斗舊餉兵該米四萬八千四十餘石及查新餉兵除撥關門南海口米一萬石又去年十二月內覆巡撫丘禾嘉餉軍索餉疏內自四年十一月

起筭至五年四月止新舊合筭尚缺米二萬石
議改折銀每石一兩該銀二萬兩新餉已發過
一萬五千兩又去歲秦兵在寧遠時缺需本色
該本部發銀議令寧鎮趁秋成米賤通折一月
隨據該司道申稱如議折給省米四萬石可備
五年之用業於預計疏中將寧鎮五年分額米
議令津部扣留四萬石撥運薊門補給防薊秦
兵之缺今秦兵調防永鎮則前項原議扣留寧
米四萬運薊者自當改撥永鎮連所撥南海口

萬石并折給一萬五千石共有六萬五千石以
新兵歲需米六萬五千九百五十五石六斗計
之止缺九百五十餘石矣查舊餉兵原有民屯
粟米四萬二千石以歲需米四萬八千四十餘
石計之止缺六千餘石矣但民屯征收在秋一
時不能接濟軍需重在本色寧使有餘以備緩
急查去歲漕糧十萬石派運薊七永三此外尚
有召買以佐不足今永鎮以十餘萬石請而薊
鎮以十萬石請酌量裒益合無共

請截漕十二萬石派運薊八永四以備匱乏以省召
買案呈到部該臣等看得永鎮當殘破之餘本
色艱難去冬臣部覆撫臣丘禾嘉饑軍索餉一
疏從十一月起屈指至今歲四月止除山海撥
米一萬石外尚缺二萬石臣部議暫改折每石
權定一兩計發過新餉銀一萬五千兩今按內
臣張國元疏開永鎮并山石二路新舊歲需米
一十一萬四千餘石新舊合盤打筭計舊餉除
民屯四萬二千石外止缺六千四十餘石新餉

除南海口撥運萬石又發米折一萬五千石又
改撥扣留寧鎮預計米四萬石外止缺九百五
十餘石總計永鎮并山石二路新兵舊兵約止
缺米六千九百五十餘石但民屯徵解有期師
旅調集難定爲荒殘之永鎮計固不得不稍存
餘地者今議截漕糧四萬石連改撥扣留寧鎮預
計米四萬共八萬石運永鎮并山石二路以贍
主客官兵至於薊鎮據撫臣傅宗龍疏稱新兵
餉銀取之加派餉米取之截漕該鎮舊運漕糧

二十四萬石嘉靖四十四年改爲十萬石循例
歲定米十萬石以

請臣查四年春疏 請共截漕粳粟米十萬石薊七
永三各取有實收

奏報在案今議截漕八萬石運薊以贍新餉官兵
以上二鎮通共

請截漕糧十二萬石粳粟各半分運薊八永四以省
召買以備緩急似爲兩便目今薊鎮經制雖待
合奏然春水已泮漕事正興恐以後時悞運故

因覆永而并展請焉至于薊鎮運道客歲原有
成議惟永鎮運道前卸糧劉家墩銀芬柳等處
因地勢窪下並無倉廩並以離邊寫遠遂致漚
爛今宜相度運道務擇高亢地面量建廩座勿
致地爛復蹈前轍是在津門督臣山永撫臣督
令司道及時會議早爲料理耳旣經題咨前來
相應覆

請恭候

命下臣部移文各該衙門遵奉施行

崇禎五年二月初三日具

題本月初六日奉

聖旨酌永漕糧依議截給永鎮遵道嚴座事宜該督撫酌便行欽此

覆東省留餉疏

題爲叛兵之猖狂愈甚全齊之關係匪輕懇乞

聖明速賜議處以救一方以安天下事專理新餉由東清吏司案呈崇禎五年正月二十九日奉本

部送准兵部咨該職方清吏司案呈本年正月二十八日奉本部送該四川道試監察御史王萬象題前事內稱一籌兵餉登鎮舊餉雖奉

旨支用矣但去歲之餉已盡今歲之餉未徵儻有取無給不又無米之炊乎請

勅戶部馳諭本省布政司不拘何項錢糧盡留備用
仍

勅戶部查有堪動錢糧先發十萬以供招募者萬不
可緩也等因本年正月二十八日奉

聖旨該部確覈速覆欽此欽遵合咨戶部煩照

明旨內事理卽將疏內所請山東留餉事宜通長裁

酌議確速覆等因移咨到部奉批新餉司查議

速行奉此具覆間又該兵科給事中馮可賓題

爲東省異變宜破嘗格急著不容緩圖勢危難

責速效事大莫惜小費敬陳芻蕘以備

聖明採擇事內稱一登餉之原額宜復夫登餉歲以八十餘萬此舊額也今裁以別用者總之爲

朝廷計然東省禍亂方殷不益之餉而反減之恐非所以重征討而籌大計也誠得

明旨立復其舊額庶兩撫犒軍募士綽有餘地二東底定所全者多臣所謂事大莫惜小費者此也等因本年二月初二日奉

聖旨該部看議具覆欽此欽遵抄出到部送司查得

山東留餉一事兩經議覆初覆科臣宋玫疏議
將通省正襟新餉併存貯司庫馬乾米折銀八
萬兩聽東登二撫酌量徵取支用次覆兵部疏
議將東省五年分正襟并民運遠餉銀兩除蠲
停分餉并解部存儲銀七十二萬有奇內以
三十二萬兩并見存司庫銀八萬兩共四十萬
兩聽二撫留用其餘四十萬零原議移餉招練
營兵仍俟事平日陸續解部等因業奉

俞旨見在奉行今臺臣王萬象疏稱不拘何項錢糧

盡畱備用又稱查有堪動錢糧先發十萬兩以
供招募科臣馮可賓疏稱登餉八十餘萬宜復
其舊俱奉

旨下部相應具覆案呈到部該臣等看得東省用兵
討叛取給東省畱餉臣部已兩有覆議兩奉

明旨見行該撫按遵行矣今臺臣王萬象慮及去歲
之餉已盡今歲之餉未徵欲將司庫別項錢糧
盡畱備用臣前疏原有通融那借總于新餉銀
內銷抵一說正與臺臣所慮相同但錢糧各有

款項未易盡數應請合行令該布政司一面將
完糧最早地方上緊催解一面將司庫或各府
庫貯存堪動銀兩先爲那發新餉解到卽行扣
補勿滋影射混淆之弊至所請先發十萬兩臣
前疏已將見存司庫銀八萬餘兩聽二撫留用
數頗相當亦儘可支撐目前矣若此外再欲部
發見今關寧薊永等鎮所在疾呼刻不容遲萬
難顧彼而緩此也至於科臣馮可賓所言事大
莫惜小費欲復登餉八十萬之舊誠屬長慮却

顧但臣部前疏雖定畱用四十萬其餘解部然
臣前疏亦云用餉未可限量事寧之後方行起
解是卽畱不盡之意以供士馬之飽騰倘一日
用兵自聽一日支用又不必拘泥掣肘者矣旣
各具題前來相應覆

請恭候

命下臣部移文各該衙門遵奉施行

崇禎五年二月初五日具

題本月初十日奉

聖旨該省留餉已有屢旨這所奏知道了欽此

覆川兵出關多支廩餉疏

題爲遵

旨查明具奏事專理新餉山東清吏司案呈崇禎五年正月十九日奉本部送戶科抄出監視關寧太監馬雲程題前事內開崇禎四年閏十一月二十四日准戶部咨爲遵

旨具奏事覆川兵多增廩給緣繇閏十一月十五日奉

聖旨各將廩給應有定額如何關寧較部咨多寡懸

殊餉冊有無溷冒還着監視與該撫按查明具奏
該部知道欽此欽遵備咨到臣該臣隨行關寧兩
道該本道叅政楊嗣昌看得秦兵萬里勤

王復命出關恢剿士衆原不樂行領兵各官又以部
發不分官卒一槩攤給兵糧實不能充邊庭珠
桂之費請援關寧則例加給廩餼卽用扣存逃
故不煩外增此亦情有可原而理無可拒者該
鎮頻會署道詳蒙閣部批行其關寧廩餼叅遊
都守中干把百成例昭然旣已准其援引自難

別爲減削然當時詳准移會月支三十兩者遊
擊王之任一員月支二十四兩者都司周之士
陳聯芳二員月支十八兩者守備馬鳳儀劉京
二員月支十二兩者旗鼓丁盛世將官馬斗鑑
等七員月支九兩者先鋒黃道表冉正選又領
兵冉選等共十六員月支六兩者管餉劉元相
方繼承周九韶又督陣冉袍等共十七員月支
四兩五錢者贊畫伯安等四員以上皆關內加
增各官之名數也其火攻提塘把總百總等項

照有馬百總月支三兩者十二名照無馬百總
月支二兩六錢者一百名照管隊月支二兩者
一百四十名乃各兵嘗例不謂加增今查寧前
道冊載月支三十兩者王之任一員與關內議
同月支二十四兩者周之士陳聯芳劉京馬鳳
儀四員比關內多一員月支十八兩者二員卽
前劉京馬鳳儀加至二十四兩也月支十二兩
者丁盛世馬斗鑑等七員與關內議同月支九
兩者楊啓泰等十九員比關內多三員月支六

兩者簡化龍等二十一員比關內多四員月支
四兩五錢者伯安等十員比關內多六員以上
各官名數比關內原議一月多銀九十兩其火
攻提塘等項月支三兩者四十名比關內多二
十八名月支二兩六錢者一百名與關內同月
支二兩者二百名比關內多六十名以上各兵
名數比關內原議一月多銀二百四兩原奉批
詳經承月日及移會手本與今造冊籍俱一一
在案等因又據寧前道僉事陳新甲呈開秦鎮

廩例俱照關內道加增奉閣部批詳本道遵而
行之中有酌量加增一二亦詳明閣部批允原
冊一一在案等因到臣該臣看得川鎮萬里入
援各官廩費該鎮併二道詳請以扣除逃倒者
增給乘遠人而鼓忠憤似無可議第督理舊冊
既已允行尚遺題

請雖無溷冒之弊實開溷冒之嫌所以煩內部之查
駁歷

呈明之詰問也今查關內道臣楊嗣昌業照例議增

而寧前道臣陳新甲復議月加官廩九十兩兵
餉二百四兩俱奉舊樞輔批允亦非虛冒臣謹
會同山永巡撫丘禾嘉巡按御史王道直據實
具奏等因本年正月十七日奉

聖旨該部覈議具奏欽此又該山永巡撫丘禾嘉會
題前事同日奉

聖旨已有旨了該部知道欽此欽遵抄出到部送司
相應覈覆案呈到部該臣等看得秦翼明所統
川兵先在薊鎮設防其官員多係空閑加銜原

非領兵之官以故量給廩餼其兵餉不分百
管隊散兵俱給一兩八錢亦無差等此臣部所
初定於供億中寓樽節之意也逮後修築凌城
川兵出防因見關寧將領廩餼頗厚而百總管
隊亦復優厚於是至關卽請照銜加給至寧又
復增官加廩若有所挾而求者維時兩道轉詳
閣部俱允其請卽用扣存迺故兵丁之餉按月
支給雖批允候題而終未嘗題此秦兵所以兵
減而餉不減之故也今秦兵已入關內分防薊

永矣顧人情繇少而得多易繇多而得少難遂
復因仍不變其將領等官食糧則例俱照關寧
不殊臣部原未嘗與聞此議故前照冊磨筭輒
訝其多此

聖明有混冒之疑而勒令撫按監視具奏者也今據
回

奏剖析已明雖關內之數視薊門有加關外之數
又視關內有加未免稍涉濫觴但俱經閣部批
允豈可失信於此輩且川兵客處日久既不便

追其已往叨藉已慣亦未便裁其將來則姑與
如數開銷焉可矣惟是將領有實授加銜之不
同以加銜而與實授者等非例也將領有管事
空閑之不同以空閑而與管事者等亦非例也
今募兵汰過已多各弁銜名太盛兵少而官多
終非便計如果此兵不願補併或尚難遽撤除
百總以下暫准免議外其餘將領仍應稍加簡
汰冗員以求可繼可久是則督撫該道之責矣
既經具題前來相應覆

請恭候

命下臣部移文各該衙門遵奉施行

崇禎五年二月初六日具

題本月初九日奉

聖旨川兵因出防加給廩餉前時替撫何不題明餉
司又何不報部其中寧免溷員念遠道久戍姑准
開銷今兵既減汰冗弁宜裁又實授加銜亦應分
別遷著該撫按會同監視詳覈具奏欽此

議覆開寧補兵銀兩疏

題爲再陳開寧情形仰乞

聖慈俯鑒以冀危疆事專理新餉山東清吏司案呈
崇禎五年正月三十日奉本部送淮兵部咨該
監視開寧太監馬雲程題前事內稱十二月正
月餉銀又欠兩月近報部發銀二萬兩行至管
家莊被嚮馬劫去五十五錠矣關門望餉不啻
雲霓庚癸之呼時時爲慮及查閱開內缺額兵
一萬餘開外缺額兵一萬三千餘近奉

明旨補足額向雖嚴令勒限竟無有應非規避從
軍之苦并且無其人耳臣再四計之欲於關內
量議盤費開外稍議安家如欲補足前數非得
六七萬金不可卽有其銀尤恐招之不足而况
爲無米之炊乎等因正月二十九日奉

聖旨這所請補兵買馬製器等銀着該部卽日議發
關寧欠餉兩月該部所司何事好生延誤餘已有
旨了該衙門知道欽此欽遵合咨戶部煩照

明旨內事理卽將補兵銀兩星速酌議湊發其關寧

兩月缺餉設法措給等因移咨到部送司查得
山海鎮十二月分兵餉植菜等銀共題六萬二
千一十兩八錢五分於十二月二十九日發銀
二萬兩委官王文瑞領運正月初八日發銀二
萬二千一十兩八錢五分委官朱國光領運十
六日發銀二萬兩委官周廷瑞領運通完訖正
月分兵餉銀共題六萬兩正月二十日發銀三
萬兩委官溫承蔭領運二十九日發銀三萬兩
委官陳國相領運完訖寧遠鎮十二月分兵餉

共題十一萬兩十二月二十九日發銀三萬兩
委官沈震源領運正月初六日發銀二萬兩委
官韓永昌領運正月初八日發銀三萬兩委官
王文道領運十六日發銀三萬兩委官曲誼領
運完訖正月分共題銀十一萬兩正月二十三
日發銀二萬兩委官胡士德領運二十六日發
銀三萬兩委官馮養正領運三十日發銀三萬
兩委官王承延領運二月初四日發銀二萬九
千九百零六兩六錢委官張士傑領運外有撥

找扣除米折節省銀九十三兩四錢共足三萬
兩正月分餉俱已完訖其補兵安家銀兩原係
兵部之事向有成例本部于正月三十日已經
咨會兵部酌議給發未見回報相應具覆案呈
到部該臣等看得關寧兵丁缺額難補內臣欲
以厚貲示招徠疏

請關內量給盤費關外量給安家超距之士當踴躍
雲集矣惟是關內外缺額兵二萬所需盤費安
家至六七萬金臣竊謂援兵入衛例有安家向

多取之兵部站銀募兵補伍例無安家今似不可輕爲開端誠恐各鎮聞風倣尤而起遂不可止是則尚須監禮會同督撫衙門從長酌議耳且此項若論及例自應屬兵部職掌聞太僕寺所貯驛站銀而正自不乏如謂兵部買馬正殷臣部未敢固執俟監視及督撫議定給發規例果不可已臣部願與兵部各任其半臣部正苦缺餉或卽于關寧扣存缺額另貯銀內動支以省措發則便計也至于山海鎮十二月分共題

銀六萬二千一十兩八錢五分正月分共題銀
六萬兩俱于十二月二十九日起至正月二十
九日止劄運赴開訖寧遠鎮十二月分共題銀
十一萬兩正月分共題銀十一萬兩俱于十二
月二十九日起至二月初四日止劄運赴寧訖
念虜儆之方殷思閑寧之告急臣部寧緩他鎮
而急二鎮計內臣拜疏之日或尚有運解未到
而正月之餉卽于正月終二月初發完較之從
前歷月者似大不侔矣臣部仰體我

皇上軫念岩疆恨不能刻期預發縮地蚤到無柰物
力有限道里爲稽非臣等之敢于延悞也既經

題咨前來相應覆

請恭候

命下臣部移文各該衙門遵奉施行

崇禎五年二月初六日具

題本月初八日奉

聖旨封疆急務豈堪駁議耽延銀兩着速給其應否
用費招徠聽監視該撫酌行該部前奉卽日議發

之肯如何延玩推諉護司官回將話來所發兩月
餉銀仍取實收具奏今後須預措按給毋得稽緩
致煩呼籲欽此

覆津撫遣發援登兵馬并給餉疏

題爲遵

旨確查速奏事專理新餉山東清吏司察呈崇禎五年二月初四日奉本部送戶科抄出兵科外抄該津部翟鳳翀題前事

奏報遣發援登兵馬併給餉緣繇內稱行糧塩菜例應彼處支給而月餉從津轉解路遙跋涉接濟維艱適准戶部咨查王洪帶去兵馬餉數就近東省給發此計甚便臣已行道將先後兩次

發過兵馬應支廩餉乾銀數目查明本部轉行
山東給發外謹將官兵起行日期遵

旨具奏本年二月初二日奉

聖旨知道了援兵月餉昨部議仍從津門解發這本
內又稱部咨就東省給發是何參差還着查明具
奏該部知道欽此欽遵抄出到部送司案查本年

正月十七日奉本部送戶科抄出山東巡按劄
史王道純題爲叛兵入登開一省之利害者小
閔天下安危者大等事本年正月十六日奉

聖旨調發援兵已有旨了一應需用糧餉着於應解登鎮額餉內支給事完覈算地方官不得時刻延誤取罪漕河關係甚重着朱光祚恪遵屢旨嚴飭該管文武各官加意防護務保無虞該部速行馳諭欽此欽遵抄出到部送司隨卽呈堂於本月十八日通行東登二撫併津部各衙門在案續於正月二十四日准津部翟鳳翀咨爲東省亂宜急彌等事咨會給發援登兵餉緣繇到部奉批新餉司查議津門除前發兵一千外又發兵一

千五百矣月餉必須預給加以行根塩菜不可
緩也奉此查得天津鎮前後調兵二千五百名
據餉司稱兵馬各給正二兩月餉乾于正餉內
銷算則本部止應將該鎮正月分預奏額餉一
萬二千一兩三錢四分割庫先發前去通融支
放或再預發二月分六千兩以資其行若行根
塩菜原係正餉之外應行另發照咨開前發兵
一千名給銀六百兩以作半月之用則後發兵
一千五百名又該給銀九百兩矣合無劄行新

庫共兌發銀一千五百兩以完二千五百名半
月行糧鹽菜以啓行日算支仍咨天津山東各
撫院知會將津兵月餉馬乾從三月起仍從津
門解發行糧鹽菜自啓行爲始除半月外卽於
東省接日開支統在新餉正襟款項內開銷并
咨部院劄付餉司速將發兵日期咨會東撫本
部知會等因奉批照行奉此卽於正月二十五
日知會津部津鎮餉司及山東撫按去後今按
津部疏似止據前次部咨而言或尚未見二次

咨文耳且近覆兵部緊急軍情一疏津兵并真
保等兵月餉俱已聲說明白業奉

欽依通行矣相應具奏案呈到部該臣等看得津門
討叛之兵原有額餉故但議給行糧鹽菜半月
預給正二月餉各一月此後兵餉馬乾從三月
起仍從津門解發行糧鹽菜自啓行爲始筭至
半月外移咨東省按日開支於新餉內銷筭臣
部原咨津部甚明卽真保諸兵亦如此議良以
津兵食臣部新餉保定兵食易州餉司舊餉真

定兵食

畿南各府措餉原自不同若槩食東餉未免款項
混淆卽臣部與東省新餉不妨通融而真保原
設額餉將置于何地乎又况東省四年之餉已
盡五年之餉未徵必欲行月兼支萬一匱乏流
彘將若之何祇緣各鎮發兵便思盡行推卸以
省輸輓之勞以免庚癸之呼其說亦覺直截但
援將援兵乍入他省終是客兵不受約束仍藉
發兵督撫威靈共爲彈壓若再不爲轉餉便覺

判不相關何以繫屬人心此臣原議逐月撥解
之意者稿與疏稿具在原無矛盾或者津撫先
接臣部通行按臣王道純奏奉

明旨有一應需用糧餉着於應解各鎮額餉內支給
一語尚未見臣部二次卷文月餉從津轉解事
理故據以入

告然應援地方支給行糧鹽菜而本鎮解給月餉成
例昭然並行自不相悖也但津門真保等處月
餉俱須先期解發寧蚤一月庶不誤事不則責

有攸歸耳既經具題前來相應查明具奏恭候
命下臣部移文津撫仍照臣部二次咨文及近經題
奉

欽依事理行糧塩菜東省支給月餉仍從津鎮解發
施行

崇禎五年二月初八日具

題本月十一日奉

聖旨知道了援兵月餉遠着各該撫預行解發不得
延卸致悞急需欽此

覆東撫議留在淮漕糧疏

題爲議留在淮漕糧以資軍將事專理新餉山東
清吏司案呈崇禎五年二月初六日奉本部送
戶科抄出山東巡撫降三級仍戴罪余大成題
前事內稱大兵四集日需芻糧倍爲浩繁臣雖
先已檄行濟青二府派解接濟但爲數零星後
必不繼不無呼庚癸之虞查漕糧在淮者似應
留五萬石以裕軍需况淮之抵膠僅相去一水
膠之抵萊又止二百里誠易爲輓運可資飽騰

為目前軍興之急着既經該道揭報前來臣謹
會同山東巡撫御史王道純合詞具題等因本
年二月初五日奉

聖旨該部看議速覆欽此欽遵抄出到部送司相應
議覆案呈到部該臣等看得師行糧從動大兵
必須裕厚精今討叛撥兵屯集萊鎮所需本色
芻糧自是不貲該撫按余大成王道純慮恐不

繼合疏

請留在淮漕糶五萬石以期接濟誠屬長策第繇淮

抵膠海中島嶼險阻輓運爲艱况漕糧有限勢
難輕議截留臣部前已議令動附近州縣預備
倉穀碾米充用及附近州縣爲登撫召買存貯
未運米隨便移用但不得用及津門召買糧料
今再慮及不敷則動用濟東兗各州縣應解臨
德二倉之米如急不湊手或陸路難行則量撥
臨德二倉見貯之米用舟載去爲訖報部作該
倉正項支銷聽該撫按擇便行之較之留在淮
漕糧繇海而膠繇膠而萊風濤難定賫盜爲恐

者似覺直捷應手矣既經具題前來相應覆

請恭候

命下臣部移文各該衙門遵奉施行

崇禎五年二月初九日具

題本月十二日奉

聖旨是着卽行該撫按酌便支用仍造冊投部以憑稽覈欽此

覆東撫題議接濟島糧疏

題爲緊急軍務事專理新餉山東清吏司案呈崇
禎五年二月初六日奉本部送戶科抄出山東
巡撫降三級仍戴罪余大成題前事內稱至於
島兵皆遼兵也我欲麾之去遼彼欲招之來登
姑使不來而未能卽去勢且不得不安之在島
遼兵一日在島卽登餉一日養遼此大政所關
應從長早計者也等因本年二月初五日奉

聖旨該省留用餉銀已有旨了島餉着酌議具奏該

部知道欽此欽遵抄部送司案查本年正月二十
二日奉本部送該兵部題爲弭亂莫急安島懇
勅伍撫相機招輯事等因本年正月二十日奉

聖旨登旣失守差官係何人所遣且所報別無情形
止以接濟島糧爲請是何緣故島兵着卽行各該
撫選擇的當員役前往安輯撫諭諸將中有能鼓
勵義勇殺叛圖功者卹以殊賞各撫仍將遣發職
名日期回奏其運糧等事宜俟有確耗另行酌處
毛雲龍果否可用還覈議來說欽此案候間今該

山東撫臣題奉島餉着酌議具奏之

旨相應酌覆案呈到部該臣等看得登州叛兵雖多
遼人然孔有德廝養微賤島中遼將遼兵未必
肯爲之下前奉

明旨運糧等事宜俟有確耗另議蓋慮海上情形渺
茫難問不欲藉寇而齎盜也閱月以來未聞島
兵從逆濟惡且塘報中見毛承祿奪孔有德之
金錢而殺其使則其心不忍背

中朝十餘年豢養之恩亦略可窺矣似當於孫元化

減定有雷島餉銀內

勅新登撫謝璉查明順逆營伍相機運發其五年分
本色原派定河東漕米六萬五千九百八石見
在津門臣部一面知會督臣鄭宗周將前項米
石揀選熟練運官堅固船隻殷實船戶預行裝
載亦俟登撫確定遵卸處所星速具奏卽爲刻
限運發或令島將差兵於要害處所接應收受
又須潛約符信勿致假冒攘竊斯萬全之策也
既經具題前來相應覆

請恭候

命下臣部移文各該衙門遵奉施行

崇禎五年二月初十日具

題本月十二日奉

聖旨島衆守順拒賊自富運糧安濟但謝璉正在行
間登路尚梗是否應着該撫查明順逆確定運卸
處所還着會同兵部詳議速奏欽此

奏報發過補兵銀兩疏

題爲恭報發過補兵銀兩仍祈

聖裁以便湊發事崇禎五年二月初六日該臣衙門
准兵部咨覆關寧太監馬雲程本內募兵盤費
安家銀兩緣繇本年二月初八日奉

聖旨封疆急務豈堪駁議耽延銀兩着速給其應否
用費拾掇聽監視該撫酌行該部前奉卽日議發
之旨如何延玩推諉該司官回將話來所發兩月
餉銀仍取實收具奏今後須預措按給毋得稽緩

致煩呼籲欽此欽遵臣不勝惶悚竊念微臣待罪
主計五載於茲一應軍興急需力苟可辦未敢
絲毫推諉誤事昨監視馬雲程再陳關寧情形
一疏科抄原未下臣部也正月二十九日接兵
部咨內稱希將

明旨內補兵銀兩星速酌議籌辦該臣備查軍興事
宜戶部止司月餉行糧從無募兵盤費安家銀
兩隨將關寧正二月餉一百速行奏發一百查
安家銀項向俱取給兵部卽移咨商議去後至

初四日尚未回覆該司郎中劉鎬因見工部司
官以覆遲奉

旨免究恐待回咨愈滋遲延遂具稿請覆臣伏細繹
明旨不直言發而言議發明示臣等查例酌給而臣
衙門實無此例卽監視疏稱非得六七萬金不
可似亦未有確數臣故欲監視查定後戶兵兩
部分任給發臣部雖當匱乏之時尤不敢以安
家獨推之兵部也目今同庫頗稱充盈臣職司
錢糧誠恐各鎮比例效尤濫觴無已異時

皇上責臣以不查舊案事執臣罪滋大實非敢以
議相諉也今奉

明旨速給敢不欽遵但未明言臣部獨任抑如疏議
兩部分任該司官惴惴畏罪卽於初八日午時
搜括新餉劄發銀三萬兩差委官鄒承武領運
赴監視衙門驗貯聽與該撫酌用矣此外尚需
三四萬金或兩部分任或臣部獨任總聽

聖明鑒裁臣部當續發以應且兵丁缺額二萬餘名
亦非一猝可完姑將此三萬兩暫供募補之用

亦足稍敷目前矣除發過十二月正月餉銀勒
取實收具奏外謹備陳履疏顛末伏候

勅下臣部遵奉施行

崇禎五年二月十一日具

題本月十四日奉

聖旨這發過補兵銀兩知道了其餘的還會同兵部
酌妥措發仍着監視該撫將募過數目及用銀若
干詳明兵奏欽此

議覆撥登馬匹料草本折疏

題爲賊勢日強狡謀叵測萊城危急旁縣空虛乞
速集大兵以安人心亟圖剿滅事專理新餉山
東清吏司案呈崇禎五年二月初八日奉本部
送戶科抄出兵科外抄該山東海右道右叅議
宋獻奏前事備陳困賊機宜緣繇內隔師行糧
從登萊青三府地瘠民窮困轉輸者十五年矣
一切本折馬料更宜早爲科筭俾軍興無乏等
因本年二月初八日奉

聖旨該部看議具奏欽此欽遵抄出到部送司又奉
本部送准兵部咨同前事內稱卽將疏內所請
東省本折馬料通長籌筭徑自速覆等因到部
奉批新餉司查覆奉此相應議覆案呈到部該
臣等看得東省討叛官兵一切應援主客所需
本折糧餉事宜則例折色取給登餉三十二萬
與現存八萬兩本色取給附近倉穀及臨德一
倉已解未解額米前疏俱經詳說明白候

旨遵行無容再贅惟是馬匹料草本折尚未議及然

總不出前留餉數內設法召買隨便辦給如本色每馬日給斛斗料豆三升草一束如不敷時再增料豆一升統於附近州縣買運卽於新餉項下開銷如願領折色每日料草共量給銀四分聽從各兵隨便買用是在兩撫及司道諸臣督率有司權宜措辦事完冊報銷筭期於飽騰有資賊逆士馬無乏芻秣而已旣經具題前來相應覆

請恭候

命下臣部移文該撫按司道各衙門遵奉施行

崇禎五年二月十二日具

題本月十五日奉

聖旨是欽此

覆川貴督撫分黔餉濟滇疏

題爲道將潰師遇難全滇事勢孤危乞急

勅督臣速撥黔將黔兵黔餉早圖會勦以救子遺事
專理新餉山東清吏司案呈崇禎五年二月十
一日奉本部送戶科抄出兵科外抄該雲南巡
撫蔡侃題前事內稱分楚餉以濟滇餉非督臣
速爲接濟立得十萬之數不可時下臨城聲息
斷絕迤東各處與省城在在皆屬可危土司敗
回之兵臣檄令整棚以救臨城未必遠應卽應

未必足恃事急矣臣不得不大聲疾呼盼望于
黔將黔兵黔餉不啻以日爲歲等因本年二月
初十日奉

聖旨該部看議速覆欽此欽遵抄出到部送司議覆
間續奉本部送准用貴總督朱燮元咨冊內開
計貴州通省兵數自六萬減至二萬二千人馬
四千匹減至九百匹爲數已儉勢難再汰自三
岔起至鴨池六廣九庄狺狼臣督總兵官王國
禎副將楊正芳范邦雄叅將陳謙遊擊彭應燧

金良田僉書袁柱芳等開過水田一十一萬七千餘畝每兵各給十畝每畝抵糧六斗可省半餉惟下六衛并安普一帶無田可開必須全給若地方別無意外得餉一十三萬有零略可支持合無請以衛永辰常請五府州屬正襟等項各餉

俯允給黔此外長保柳三府州屬尚餘正襟等餉一十四萬六千零當東方多事物力告匱之日本當歸還司農用充遼餉奈今滇事又決裂不可

支矣若非專設將領假以事權大發接濟必不能完此大局該省前後撫臣每每疾聲大呼索勦於臣獨不念二二萬人經年缺哺盼解一到如饑馬逢芻闕然羣起誰能割而之他乎合無將黔所還一十四萬有零正襍各餉行長寶榔三府州屬轉以餉滇俾滇省差官轉督起解庶幾兵食稍裕剪滅有資此實權宜萬不獲已之計伏乞

聖明勅部酌議

俯允撥給將衛永辰常靖五屬正襍銀一十三萬一
千有零餉黔長寶榔三屬正襍銀一十四萬六
千有零餉滇責成該省依期起解早獲接濟等
因除具題外咨冊到部奉批據議讓餉於滇具
見同舟之誼新餉司查議覆行奉此除黔將黔
兵聽兵部議覆外所請黔餉一事相應議覆案
呈到部該臣等看得滇省兵連禍結欲分楚餉
以濟滇急蓋萬不容緩者查四年六月中臣部
覆滇撫王伉夷情孔劇一疏議將滇省四年分

應解戶部加派雜項錢息以及舊餉銀約十萬
餘兩盡聽該省留用楚餉解黔者撥十萬兩仍
聽川貴總督酌量食兵多寡刻期差官轉解滇
省充餉奉有

欽依通行在案今據滇撫疏稱非督臣速爲接濟立
得十萬之餉不可則似已知臣部留餉撥餉而
但苦接濟不前者或黔兵見在需餉楚解一時
稽延不能緩黔而急滇耳然

明旨方新震隣同患臣部殊鯁鯁然慮之續准督臣

朱爨元咨稱黔兵自六萬減至二萬二千馬自
四千減至九百前部撥黔餉二十七萬有零今
但得餉一十三萬有零加以開過水田以糧抵
餉便可支持議將楚省長寶柳三府州留黔正
襍一十四萬六千零盡以餉滇而以衡永辰常
靖五府州正襍一十三萬一千有零仍留餉黔
其餉滇府州各屬俾滇省差官專督楚省依期
起解早獲接濟等因夫黔督汰兵屯田一朝而
減十四萬之餉以餉滇其數殊夥其爲隣謀至

忠乃知從前之未能多助者總緣楚解之不至
而非故爲秦越視也臣部亦無容再爲撥派矣
惟是填氛甚惡需餉甚殷撥泐易而解到爲難
合無責成湖廣撫按藩司文到督率該俯州縣
立令起解四萬餉滇嗣後每月解三萬限四閱
月通完滇額而長寶榔三地不能猝辦卽令藩
司不妨於別項通融撥補督臣於滇原有統轄
之責本非局外之事亦宜力爲督催護運如有
逋負延緩聽令黔督滇撫查照考成近例從重

恭竢則軍餉克供而庚癸無呼矣俟滇事平日則此新餉十四萬有奇皆當歸還臣部可也既經黔督滇撫題咨前來相應覆

請恭候

令下臣部移文川貴總督楚滇兩省撫按及布政司衙門一體遵奉施行

崇禎五年二月十五日具

題本月十六日奉

聖旨滇中需餉甚急這所議分黔餉十四萬着湖廣

撫按嚴飭藩司刻期起解不得延悞取罪朱燮元
身任總督仍着檄催濟運勿但以分給却責欽此

覆津撫條議頒法馬立風信疏

題爲兵制既定餉弊宜嚴謹陳切實四畧懇題請
旨施行事專理新餉山東清吏司案呈崇禎五年二
月初二日奉本部送戶科抄出兵科分抄該山
丞巡撫丘禾嘉題前事內稱關門經制粗定按
地分營差有頭緒本折糧料動經數十萬道臣
楊嗣昌條議給關防頒天平邊倉官立風信四
款言言中際大有經畫可謂直窮弊源臣謹備

錄

進呈

御覽伏乞

聖明裁奪

勅部速履施行等因列欵具題本年正月三十日奉
聖旨該部酌議具奏欽此欽遵兵科外抄到部送司
除給關防選倉官二欵聽吏兵兩部議覆外所
有頒天平立風信二欵事屬本部相應開欵議
覆案呈到部該臣等看得津運本色最苦影射
于遭風京運折色往多藉口于兌折致令海若

爲奸運解嘲而司餉代稱委負謗從未有留心
及此者今據撫臣丘禾嘉代請關內道楊嗣昌
所議四款皆切中事宜除頒給關防增選倉官
聽吏兵二部議覆外謹擇其二款關切戶部職
掌者如議覆行焉恭候

命下臣部行文各該衙門遵奉施行

計開

一 請頒本道天平以爲驗餉之準今內部
發銀委官領到必日庫折及餉司發銀

管官領到又曰庫輕間詣道驗封取
餉司之天平既同乎彼矣取關庫市
肆之天平又異乎彼矣從何正之切
謂必請部頒較準天平付本道衙門
收執如遇部解司發皆得取較乃可
免高下丰之弊而部發之銀必用鞘
單錠件珠邊一一填註印鈐司發之
銀必用秤單一秤二秤以至十百秤
俱註定數目仍每錠貼一號二號照

單覈允斯可遠異同口實之嫌

前件看得人不信伯夷而信權衡以權
衡無心不可欺也今據道稱委官赴
關則稱新庫允輕將領到道又稱餉
庫允輕將誰使質之該道臣楊嗣昌
起家臣部曾經管理新餉其於領運
情偽習察最真臣部年來發餉俱臨
委官同原解允支其低潮短少自是
委官之責迫餉司轉發該營不能逐

一包封或百名千名總領就中焚并
藉口亦不能保其必無惟是各鎮道
俱未頒發天平而臣部向以省直法
馬輕重滋爲詬厲法無全利存乎其
人今令新庫備開銷單錠件印鈐以
發之餉司餉司再用秤單秤號註定
錠件印鈐以發之領并倘有藉口不
足者該道按號而稽之卽移取餉司
天平允驗在餉司亦不許固執不發

則不必另發天平一出入之間自
無容高下其手矣伏候

聖裁

一請立沿海風信以釐稅報之奸海運糧
料難問水濱此朱風之所以虛捏而
盜賈之所以多奸也本道細訪天津
至南海口得西南風或兩日一夜或
兩夜一日甚或一日一夜皆可達舡
在大洋不觸礁淺無失風事也如或

失風定打近岸地方海口皆得知之
同幫紅隻同日發運者皆得稽之總
本費幾矣風必先益賣凡益賣必在
大沽賣米一石得銀一兩三五錢及
通同海口倉委折乾不過七八錢利
之所在何憚而不賣法在天津嚴督
出洋南海抵岸亟催收口已到南海
拋貓遇風浪而進口者船實也不進
口而捱浪者糧虛也爲今之計預行

沿河州縣計某晝夜有風無風或大
或小五日一次報知津道本道以爲
嘗而在天津查在船糧料若干某日
督出大洋移會本道在本道查到關
舡隻若干某日收入海口回覆津道
計日計程仍以州縣之報爲憑兩道
仍各立風占視八方以爲極則小海
諸口有無失風船隻打岸及通回囤
賣之人亦宜各取甘結月報以憑互

查倘扶同隱匿事發併究以上似非
難事而沿海州縣有非兩道所能遙
制者不得不請

旨嚴行也

前件人情踈實則藏匿易露駕空則風
影難稽海運不戒于礁颶言之可信
而疑之無從偵察故失風遭風率爲
盜賣者口實道臣謂天津至南海口
得西南風一日可達不觸礁淺無

失風事其偶爾風色不順必打近听
地方若證以海口居民及同日運發
之舡幾于暗海之明犀所當如議

勢下津部撫按預行沿海州縣將某日晝夜風色方
向大小五日一報津道及關道存案
津道亦將發運出洋日期先行移會
關道以便稽查更于大沽近听處所
及海口倉委細查其益費賤折之弊
一體取具片結則船戶稍知悚惕而

奸偽亦已強半黜奪之矣伏候

聖裁

崇禎五年二月十五日具

題本月十九日奉

聖旨該道請頒天平正欲出入畫一若但以鞘單錠
件爲據仍屬游移前時法馬輕重明係司昏奸弊
何得藉口庇徇還著較準頒給以便稽覈餘俱如
議飭行欽此

議覆各倉改委有司收支疏

題爲恭報查過米豆草束并陳末議以杜弊蠹事
專理新餉山東清吏司案呈崇禎五年二月初
二月奉本部送戶科抄出監視薊鎮太監王之
心題前事查叅倉委商役巫星佛張智學等侵
欠米豆草束數目緣繇內開諸奸得以遂其侵
欠者雖貪黷性成亦因商委倉官自收自放操
縱在已蠹耗繇他營私作弊何所不至也臣不
揣愚蒙敬陳一得竊謂商委止供輸納倉官惟

令監守其出入收放宜委任附近州縣正官及
才幹府佐將領如薊州倉當委知州遵化永益
倉當委知縣太喜松馬及漢庄三屯各倉或委
管糧練軍二廳或委營路將領威令既足服人
而不敢作弊操守必知愛鼎而不致縱人作弊
且綜覈之以餉司稽查之以兩道至於總查又
聽撫臣與臣有不稱委者得以糾叅從事其孰
不自愛而不思所以清其弊哉等因本年正月

三十日奉

聖旨軍儲關係甚重據查米豆草束虧欠數多且又濕爛攙和倉委巫星佛等俱着會同該撫按嚴拏追究李雲衢曾否查覈糾參着自行回奏其收放改議委任該部卽行確覆欽此欽遵抄出到部送司除卽呈堂咨行監視衙門會同該撫按將倉委巫星佛等侵欠米豆草束嚴行追究併劄餉司李雲衢自行回

奏外所議收放改委事宜相應確覆案呈到部該臣等看得本色關軍興切用往往收受非人致

以辛苦物力養倉委之雀鼠誠可惜也監視王
之心議革此弊欲令商委止供輸納倉官惟司
監守而出入收放不得假手焉相應如議嗣後
收納米豆草束在薊州者委之知州在遵化永
盈倉者委之知縣太喜松馬及漢莊三屯各倉
分委管糧練軍二廳官督率倉委加意料理而
又總覈之以餉司稽查之以兩道廳州縣諸有
司以畏

功令惜清議之心爲畏濡柴惜物力之心而一粒

一草斷未有肯泥沙浪擲以滋乾沒者其千軍
與裨益不淺矣既經監視具題前來相應覆

請恭候

命下臣部移文各該衙門遵奉施行

崇禎五年二月十七日具

題本月二十日奉

聖旨這所覆各倉收放改委州縣糧廳等官依議飭
行欽此

覆山永巡撫議免營伍循環疏

題爲遵

旨查明具奏事專理新餉山東清吏司案呈崇禎五年正月十四日奉本部送戶科抄出山永巡撫丘禾嘉題前事回

奏關內餉司林玄扣抵無馬兵丁銀兩緣繇內開馬價一項目前急需餉司旋借旋還迄還又借甚至併招練之馬價甲銀亦借則關門徒擁虛名耳萬一有警

皇上切責臣等將諉之司農乎抑自任其咎也伏乞
皇上勅下該部立將所借關庫銀四萬八千七百二
十一兩一錢措處速解容臣等買馬造甲毋俟
餉到扣還庶免歷月之陋規得濟然眉之急用
飽騰皆有賴矣再照季報責成該道提綱挈領
自足清查營伍循環祇滋煩費相應如道臣楊
嗣昌議免該營另造均望

聖裁施行等因本年正月十三日奉

聖旨戶部按月發餉屢有明諭如何不遵以致餉司

轉折那借據奏舊貯無馬丁銀併招練馬甲價值俱被借用何以增補兵騎且如此移支保無侵濶內部欠餉及劉孔敬借支情繇俱着明白回奏季報責成該道免費循環着該部酌議來說欽此欽遵抄出到部送司隨即呈堂劄令該餉司劉孔敬將借給情繇自行回

奏去後本年二月十二日奉本部送戶科抄出該餉司劉孔敬奏爲遵

旨回奏事內將借給始末情繇併補還數目備述回

奏本年二月初十日奉

聖旨這借給月餉併補還情繇知道了今後部發不許踰期仍着該撫鎮嚴飭營將約束部伍毋得置挾自干軍紀該衙門知道欽此欽遵抄出到部送司除通行遵照外所有內部發餉併季報責成該道事宜相應具覆案呈到部該臣等看得各鎮之發餉繇臣部臣部之發餉繇外解倘外解踵至庫藏充盈何難按期預發無柰軍興之徵調多年宇內之物力有限卽檄催如雨不能源

源而來以致題發餉銀每係下月方完上月之數者勢也如關鎮十二月分餉自本月末旬發起至今歲正月十六日發完而該鎮各兵藉口年終環向餉司迫索十二月之餉以資卒歲餉司劉孔敬移會監視撫道暫借庫貯無馬丁銀并馬甲價值銀兩奏數給散以慰驕悍亦出一時權宜之苦心今既隨于解到餉銀內照數補還自可無悞買馬製器之需矣至于季報一事去年十一月該津撫翟鳳翀具有酌定本年冬

春關門馬匹草束一疏內稱本折支銷應如道
臣楊嗣昌議按季冊報餉院查核因馬以知草
數復因草以知馬數兩無虛冒之弊等因奉

旨下部臣部覆議疏云買草莫非餉銀卽發銀亦經
餉臣掛號而本折銷算餉臣應得與開合如道
臣議將收支本折季報督餉御史查覈於閏十
一月內覆奉

欽依通行在案是津撫之代題與臣部之覆

請一如該道臣所議原無管伍循環之說今道臣楊

嗣昌身承季報責任議免營伍循環正恐軍士
未曉營弁借名或以清查之法爲科歛之端故
復暢其意而申明之耳事關釐剔不妨詳審相
應如議允行者也恭候

命下臣部移文各該衙門遵奉施行

崇禎五年二月十八日具

題本月二十一日奉

聖旨該部職司邊計正當詳籌按發用濟急需勿但
以外解不繼爲辭季報責成該道免費循環依議

飭行如有管弁借石科欵的着該撫同監視嚴查
究懲不得徇縱欽此

覆關門建廠并議增餉價疏

題爲海口積貯非宜鎮城創廠當亟併所議增海
運腳價直輸關庾以杜外患以固軍儲事專理
新餉山東清吏司案呈案查崇禎四年十二月
初八日該本部題覆關內餉司劉孔敬奏前事
本年十二月十二日奉

聖旨這鎮城建廠動支貯銀分用班軍等事卽着該
鎮道會同監視計議舉行查覈虛冒督稽工作務
期堅整早完有神積貯其量增運價依議着天津

衙門酌妥具奏欽此欽遵隨將建版事宜行令山海鎮道會同監視衙門遵照奉行并咨津部將量增運入鎮城腳價速爲確酌具奏去後今二月初四日該津部程鳳翀回咨內開行據督餉道呈稱查得南海口船糧收泊最險起卸少遲則風波不測往往失事舡戶每每道苦若復令搬運鎮城不惟往返難以照管恐催募車輛耽延時日有悞運務深爲不便合無請乞本部院移咨內部檄行山海司道聽議給倉委等官歇

價若干責令各委催車轉運以本地之官催本地之車莫便于此等因到部院據此看得關門倉廩改建鎮城則津運糧料亦應轉運入城不待再計而決者第查路程雖僅十餘里而水陸殊途開津異地亦多未便蓋南海口礁石巉岩船難久泊一到卽卸防護潑也一卸卽交速回空也若令之輸運鎮城勢必耽時悞運且船糧不能兩顧米豆踈失堪虞此各船戶嗷嗷呈訴咸以不便爲辭也似不若責令彼處倉委集車

轉運畫一定其腳價上管嚴爲督查事半工倍

計莫便焉等因到部奉批新餉司查議具題奉

此相應議請奉呈到部該臣等看得集事者利

一而害倍則更之逆多而順少則仍之開門建

厥于鎮城議令津門船戶徑運至倉于以省盤

剝侵耗之弊爲關門計甚便然而守候起卸風

波盜賊關門秦越津船特恐意外之虞且米必

入倉而後給實收未革倉委耗沒之弊又增船

戶才難之苦查南海口距關不遠與其增價于

津船何如給價于關門聽令餉司兵道督海運
廳僱車僱夫計程計石子以隨時見價而津船
仍舊卸至海口交割實收卽令回津斯交納無
煩于更張而軍糈亦可免於稽悞矣既經津撫
查咨前來相應覆

請恭候

命下臣部移文各該衙門遵奉施行

崇禎五年二月十八日具

題本月二十一日奉

聖旨依議欽此

查奏新餉出入大數疏

題爲遵

旨查奏一切新餉出入大數仰祈

聖鑒事專理新餉山東清吏司案呈崇禎四年十二月初二日該本部題前事本月初七日奉

聖旨據奏新餉歲計出入大數其入浮於出尚溢額一百二十餘萬儘可會計贏節增蓄裕儲何得輒以浮價冗費及入數難恃等語先行寬假撫賞銀稱歸太倉原克遼鎮之用係何項支費併餘銀二

十餘萬仍聽太倉舊餉支銷明屬混淆有無借具
通著奏明向因撥兵紛集經制參差以致費煩難
覈近奉旨酌議補併畫一責成自可按兵給餉克
然有餘這本內出數着俟兵制確有成議還與兵
部計定另本開明來看欽此欽遵除新餉出數與
兵制事宜已有成議見該本部會同兵部另疏
合奏外所有撫賞餘銀二項相應查明具奏案
呈到部該臣等看得遼鎮舊餉原設京運銀五
十二萬五千六百一十二兩三錢五分未有遼

事之先臣部原無新餉庫每年割發皆於太倉庫內支給逮後設有新餉司與新餉庫而畛域始分然遼鎮京運仍在太倉京邊之內原無另坐地方及另設款項但前此司新餉者或多寡無常或紛執不定臣部於崇禎元年十月中具題坐定北直山東應解太倉京運銀二十萬兩歸新餉爲召買之額卽作遼鎮京運之數此外尚有戶部認發虎煨炒花等撫賞銀一十一萬六千六十二兩五錢查虎煨部落向係遼東棲

巢夷人後挈巢西徙卽移遼賞以賞於宜其與
宣大互市撫賞原自各別內崇禎三年春季爲
始認發拱兌賞六千七百六十二兩七錢七分
見經題發遼撫收給應於遼鎮太倉銀內開銷
又提塘銀二千五百兩遇閏加二百兩查天啓
二年二月內准兵部咨稱據遼東提塘千總朱
國孝呈各軍月餉向係遼鎮支給今該鎮雖失
塘撥尚存相應酌給月餉銀兩以勿悞邊報嗣
是相沿支領亦應於遼鎮太倉銀內開銷臣

疏所謂雖歸太倉支放原克遼鎮之用者此也
餘銀二十萬六千八百四十餘兩仍存太倉作
舊餉支銷蓋因新餉加派漸增而舊餉節年缺
額不得不稍示接濟昨已列在邊餉出入額數
內具奏奉有

明旨允行矣是則遼鎮京運分用之始末亦已具悉
原未敢有涸涸借員之弊也謹遵通着奏明之
旨據實具奏恭候

命下臣部遵奉施行

崇禎五年二月十八日具

題本月二十一日奉

聖旨遼鎮舊餉以二十萬兩改充召買知道了餘銀
仍存太倉作舊餉支銷係充何項且舊餉自有定
額何待多借遼餉至拱免賞及提塘銀不過數千
遽稱撫賞銀雖歸太倉仍充遼鎮之用明屬濶節
這事情奉旨已久何時方行回奏通著該司官
明白奏來述旨內輒字訛卽本內設字訛沒俱改
正行欽此

會題東撫議運島餉疏

題爲緊急軍務事專理新餉山東清吏司職方清
吏司案呈崇禎五年二月十四日奉本部送戶
科抄出該戶部題覆山東巡撫余大成議運島
餉緣繇本年二月十二日奉

聖旨島衆守順拒賊自當運糧安濟但謝璉正在行
間登路尚梗是否應着該撫查明順逆確定運卸
處所還着會同兵部詳議速奏欽此欽遵抄部送
司隨卽呈堂移咨兵部酌議去後本年二月十

七日奉本部送准兵部回咨內稱島眾枕義拒賊自當設法接濟以鼓忠懷但新登撫尚在圍城登海一帶道途梗阻卽欲該撫查明順逆酌定運貯處所亦無從照會今不若姑卸天津聽津撫選差的當員役出海查明各島孰順孰逆順者餉之逆者勿與今准移查相應咨回以憑議妥會

奏等因批送到司相應酌覆案呈到部該臣等會同兵部尚書熊明遇等看得島眾沐養之

恩十餘年矣從順拒逆之形雖未見有成效然當叛
兵招搖煽惑之際速議津運以示鼓舞蓋有不
容緩者但運道旣梗賁寇可虞登撫守萊照會
惟艱臣等再四商確令無姑令天津督臣察順
逆爲行止雖津撫亦不能遙度而近日奉

命差官出海必能偵知海外情形急須確探順逆酌
量多寡以爲接濟又須預截糧米夙戒舡隻以
應呼索勿致急求緩應尤當定計于先者也至
於東省撫按諸臣亦當體察島上順逆確情不

時

奏報移會以憑撥運糜不致果剽掠之腹腹向往
之心矣既經具題前來相應覆

請恭候

命下臣等移文各該衙門遵奉施行

崇禎五年二月二十一日具

題本月二十三日奉

聖旨島兵糧運着洋撫查明順逆酌量接濟併截糧
備船事宜俱依議欽此

查覆關兵在薊行月兼支疏

題爲入關援兵行月兼支懇乞

聖明申飭以信法守事專理新餉山東清吏司案呈
案查崇禎三年十月二十八日該本部題前事
本年十一月二日奉

聖旨據奏援兵行月二糧分地關支原有成例今謝
尚政等兵兼支薊餉忠義營又多支米至八百餘
石經制不定混淆無稽着行該督撫通行查覈支
過月餉應否扣抵行糧并多支薊米有無虛冒逐

一錯筭度杜濫賜但遵兵赴關領糧轉輸勞苦亦
須軫念其私可否改折并行酌議具奏欽此欽遵
隨即咨行督撫查議除謝尚政等兵暫准行月
兼支內月米權宜給折見人葡鎮經制另與兵
部彙疏合

奏外所有忠義營多支米石情緣屢次行查續准
薊撫傅宗龍咨前事內開先據署管餉廳事遵
化知縣郭凝鼎查得忠義營多支米八百餘石
據稱正二兩月兵少支少三月至六月兵多支

多餉司給發錢糧必繇院道衙門掛號經幾次
查確方准支領逐月根冊可按名而核者除申
軍門外擬合申詳等因在卷今准前因該本院
復行署團練事副總兵鄒宗武確查多支米石
緣繇去後隨據該副將呈據中軍副將邢萬民
回稱查得忠義營之兵原係總理馬世龍抽調
關寧精健赴薊征剿給以行糧四斗五升復念
各兵有血戰之勞家口在關寧照例給坐糧五
斗蓋亦惟恐東憂內顧也至于數目之參差當

招徠之時兵以積累而遞增按月新收可查
不泥于正二兩月之餉冊且自三年七月起至
四年二月業蒙本院及前鎮提督王威軫念
國精之艱將此月米畱爲節省少濟匱乏迨後止
支月米不支行糧已經具題欽遵在卷等情轉
報到院據此該本院看得原任謝總鎮兵丁自
關寧入援鹽菜支于薊餉米支于關寧此成例
也嗣因家屬來遵銀米併支于薊且請以米折
銀已經內部劄司准其暫折至于忠義營兵丁

陳策等役過月米比例找支查四年六月間該
平院具題營兵比例太厚一疏內部議覆補給
八個月折色奉有

俞旨俱無容議矣惟多支米八百餘石歷查詳駁良
以正二月兵少支少三月至六月兵多支多以
征調不嘗致後先數異而添兵添餉必過驗乃
始掛支委無影冒之弊既經該鎮副會呈前來
擬合咨覆等因到部送司相應具覆察呈到部
該臣等看得謝尚政等關兵在薊行月兼支時

臣部恐啓各兵效尤之端故有領過月米抵作
後來行糧之議及奉

明旨曰領過月餉應否抵扣行糧又曰遵兵赴關領
糧輓輸勞苦亦須軫恤其私令臣等酌議臣等
仰遵

德意咨行督撫諸臣確議因念此輩業携家屬于薊
且恢復有功與別兵不同議將月米改折暫行
兼支以示軫恤查關寧額米已爲開除則薊支
米折不爲重負繼而謝尚政一旅改屬鄧瓚今

已入薊鎮經制矣 王副將鄒宗武下忠義營先
據薊鎮餉司蔣範 凡呈報該營兵丁陳策等代
支關鎮三年正月至六月米共三千七百七石
等因臣部因無每月兵數取正二月餉冊稽之
止月該米四百七十二石律以三四五六四個
月較多支米八百餘石誠恐隔地補支未免具
昧重復故令查明以便銷筭今再四行查准薊
撫傅宗龍回咨內稱正二月兵少支少三四五
六月兵多支多兵丁之驗收有案月糧之掛給

有單既無重員之弊似應准與開銷者也既經
勦撫確查明白回咨前來相應覆

請恭候

命下臣部移文該撫司道遵奉施行

崇禎五年二月二十二日具

題本月二十七日奉

聖旨是欽此

議覆東省留餉准民間隨便輸納本色疏

題爲疆圉之阡危已極戰守之圖畫空周謹杼一
得以佐

廟身事專理新餉山東清吏司案呈崇禎五年二月
二十九日奉本部送准兵部咨該兵科給事中
孫三傑題前事內稱一軍興之供億宐裕也大
兵雲集米薪難敷縱囊饒金錢而饑不可食也
近奉

明旨登餉准兩撫支用合無檄該州縣將菽粟柴薪

之顛按其地方之大小遠近解赴軍前交割計
價值轉運之費開報撫按准作解過登餉開銷
庶糧糗不缺而士馬飽騰也等因本月二十六
日奉

聖旨該部着議速覆欽此欽遵到部送司除各欵事
隸本部者徑自具覆外查得疏內供億軍興等
項一欵事隸戶部相應移文知會速行酌妥具
覆案呈到部合咨貴部煩照

明旨內事理即將疏內所請供億軍需事宜從長酌

確速覆等因到部送司相應酌覆案呈到部該
臣等看得山東勦叛本色臣部已題定動用州
縣倉穀及臨德二倉應解額米馬匹草料於附
近州縣買運卽開銷新餉願領折色者每匹日
給銀四分奉有

兪旨通行已久今據科臣孫三傑議將民間菽粟柴
薪之類有餘堪以輸納者計其時值腳價解赴
軍前准作留用登餉應徵實數於計甚便相應
如議

允行仍責成該省督收督運各官勿抑勒以苦民勿
冒破以病餉可也再照臣前疏原有查用附近
州縣爲登撫召買未運一項昨據原任登撫孫
元化揭帖內開島米四年分額該一十三萬七
千七百餘石四年正月七月減兵五千八百餘
名該存米二萬五千餘石留作五年正糧除預
發失風等項尚有囤積海口俟春初啓行者惟
淮河口平度州最多又四年分津運六萬八千
石約完九分止耆民董養純裝米九百九十石

在壽光縣塘頭河守家俱應查收公用查淮河
口平度州壽光縣皆逼近青菜見在米石不煩
糴買亦應

務令撫按檄查起運軍前一體報部銷筭免致日久
化爲烏有而於飽騰所補不小矣敢因覆科臣
疏而并及之既經咨會前來相應覆

請恭候

命下臣部移文各該衙門遵奉施行

崇禎五年三月初二日具

題本月初五日奉

聖旨民間新粟果有贏餘願售該州縣官公平買運
以佐軍興不許抑勒科索致滋擾累其島米津運
見在存貯的依議查收應用報部銷筭欽此

覆津撫題請出海防汛兵餉疏

題爲聲援貴速水兵甚少謹遵

旨酌量密奏以剪逆醜事專理新餉山東情更司案
呈崇禎五年三月初四日巳時奉本部送准兵
部咨三月初三日亥時蒙

御前發下紅本天津巡撫鄭宗周題前事議請出海
防汛兵餉銀兩內稱多或發銀一萬五千兩少
者一萬兩差官解津以應急需等因三月初三
日亥時奉

聖旨該部酌議速覆欽此欽遵爲此合咨貴部候
明旨內事理卽將疏內糧餉事宜議妥速覆等因移
會到部送司查係遣發應援水兵餉銀相應指
發案呈到部該臣等看得登之距津蹂陸非半
月不達而繇海風便則數日可至故扼吭擣虛
牽制內顧皆今日急著也今據津撫鄭宗周議
撥海船募漁船挑選水兵水手統以慣海將領
出沒珠門廟島之間以掣其勢而伺其瑕度津
撫新猷饒爲之所慮者支費不足耳臣部當劄

新餉庫發銀一萬兩差官解往天津聽樞部津
撫隨互調遣速興水犀之甲蚤奏海上之捷完
日冊報銷筭可矣既經津撫具題兵部咨會前
來相應題覆恭候

命下臣部移文兵部津撫遵奉施行

崇禎五年三月初六日具

題本月初七日奉

聖旨依議速發著沿途護送前去取實收繳部欽此

覆津撫條陳預備援兵行鹽事宜疏

題爲酌議援兵經過事宜以靖地方事專理新餉
山東清吏司案呈崇禎五年三月初五日奉本
部送戶科抄出兵科外抄該津部鄭宗周題前
事內開崇禎五年二月二十二日據天津道右
叅政朱大典呈蒙臣憲牌案照先准兵部咨題
爲探報事內開師之所過必不能枵腹露處監
將嚴爲約束固也而撫按須預行該道府縣官
先行料理宿食卽少有所費不妨于贓罰正項

積穀銀內開銷如有違誤各行卽以軍興法論
罪等因題奉

明旨合咨前去煩爲一面着檄地方有司各援兵經
過處所預備糧料設法接濟等因准此除行該
道外查得近日津門發兵援登一切糧料俱係
先發銀各州縣備辦今各處援兵經過似可做
行仰道卽將目今各援兵馬匹經過所屬州縣
應該作何預備糧料草束一兵一馬計一日需
用若干該價值銀若干銀兩作何請給作速查

議妥確具文呈報等因蒙批隨行河間府查議
去後未據回報該本道案查得津門前次發兵
一千五百名馬一百匹統領將官二員行間慮
其執持器仗則耳目之易駭也大衆齊行則安
插之難週也自覓芻糧則買易之生擾也卽按
日給以行糧矣而不定以程限則勤惰之罔別
也於是按名收其器械載以車輛委官督之前
行應調兵士陸續點發分作五運每一運兵三
百名馬二十四匹領以一把總會計兵十名給米

一斗饅頭五十個肉二斤酒三斤腐十斤鹹菜
五斤共筭銀三錢頭晚一餐次早一餐中途午
餐俱取給於是馬每馬一匹草十斤料豆三升
筭銀二分九釐俱於行糧馬乾銀內扣給先期
差官賚送任歇州縣令印官代爲料理應付又
差官賚銀具揭東省兩院移會藩司凡彼地經
過州縣亦照前行其行糧照例每日四分仍酌
定以六十里爲一程通融扣筭若兼程而行餘
銀坐給此津門前次發兵處置之亭空業已兵

民兩安王客相安矣今次各鎮所調援兵應否
做行惟在兵部通行發兵鎮道及兵過處所照
例做行未必非計之便也其行糧鹽菜前次調
兵北直境內俱於本鎮給發既至東省卽於彼
地起支曾經題明今次理合照行等因到臣該
臣看得師出以律期於秋毫無犯乃稱時雨之
兵但處置失宐則以安民者擾民亦立法者之
未能盡制而曲防之也查正月津門援登之兵
曾發一千五百名馬一百匹卽以行糧鹽菜之

銀爲路途日費之用凡一應經過地方隨先送
印官備辦器械收藏則軍心易戢計口授餐則
士皆宿飽而且以三百人爲一運勢分則供應
自閑以六十里爲一程期定則逗遛難假就此
料理食宿之中默寓東伍節制之法可謂纖悉
具備矣津門爲南北孔道相應預先題明庶免
驕兵借口芳規具在前事可師亦兵民兩便之
術也再照各兵給有行糧馬匹領有乾銀夫於
本等月餉之外又給行糧者何正所以爲行糧

之糧也乃部谷又云不妨於贓罰正項積穀銀
兩開銷設法接濟夫既於罰穀銀內支銷則糧
銀將安用之當此際財殫力訕之時畲爲可大
可久之計尤在戶兵二部熟計而深處之也等
因崇禎五年三月初四日奉

聖旨該部看議速覆欽此欽遵分抄到部送司相應
議覆案呈到部該臣等看得調援兵馬各有本
等月餉料草此外加給行糧鹽菜日該四分二
釐其每馬一匹日支草一束料三升或本或折

折則率從其厚共給銀四分例不行坐兼
門前次調兵臣部覆奉

明旨月餉解自津鎮行糧自津起行支給至應援
勦地方卽於該地方關支真保兵及鄧玘南兵
皆照例題明今津撫題議誠恐過往援兵要旅
逗遛欲如津門前次發兵事例收其器械載以
車輛委官督押前行其行糧鹽菜日給四分先
期賚赴所過州縣令印官代爲料理應付仍酌
定以六十里爲一程其兼程而行者餘銀坐給

本兵於計程授殮之中寓鼓舞節制之意此其法甚善其爲兵民兩便計甚周相應一體通行以杜援兵之騷擾以免風霍之驚避可矣及查兵部疏云少有所費不妨於贓罰正項積穀內開銷或亦念地方飲食時值有貴賤原給行糧未必在在宿飽萬一不敷該地方不妨量有補賞勿致膠柱啼餓耳然而法期畫一事處更端各兵終日三餐槩仰給于地方亦覺未便仍宜查照舊例每兵日給行糧鹽菜銀四分二釐每

馬日給料草銀四分俱于發兵之時本地官
措辦計道里遠近日期遲速照數給發不必例
給沿途州縣但採津撫之議而善用之或差官
預賚州縣代爲具備或徑給與兵士隨便平買
是在各督撫及裨兵監軍將帥約束申飭難拘
一律若夫空廬偏側薪水艱難地方有司調停
市肆曲爲設處以資飽勝此又該地方休悉之
苦心而不可廢者其要惟在紀律嚴明按期給
餉爲第一義也既經津撫具題前來相應覆

請恭候

命下臣部移文各該衙門一體遵奉施行

崇禎五年三月初八日具

題本月十一日奉

聖旨依議行這本著速覆如何遲至數日方奏該司
官殊屬怠玩姑不寃欽此

覆關撫條議召買招練營米豆疏

題爲亟議招練本色兼

請查覈專官事專理新餉山東清吏司案呈崇禎五
年三月初五日奉本部送戶科抄出山永巡撫
丘禾嘉題前事條議添設理刑推官駐劄關門
帶管招練餉務并議召買招練本色緣繇本年
三月初三日奉

聖旨關門理刑前已有旨旣稱餉務查覈需人著該
部酌議具奏招練糧料未經派發作何召買接濟

著速行措處毋致延悞該衙門知道欽此欽遵
抄到部送司查覆間三月初七日續奉本部送
佳山永巡撫丘禾嘉咨爲恭請酌派糧料信地
以便按期發運事內開准天津督餉兵部右侍
郎鄭宗周咨前事等因准此行據關內兵備參
政楊嗣昌呈稱會准山海餉司劉孔敬查得山
海關內經制之外新增招練鎮五營今見在兵
七千三百五十名歲該米四萬四千一百石如
足二萬之數歲共該米一十二萬石見在馬二

千七百一十七匹歲該豆三萬九千一百二十四石八斗如足一萬匹之數歲共該豆一十四萬四千石俱應分卸于前屯中前中後三城庶便關支備會到道該本道叅政楊嗣昌查得運糧料關內兵馬應卸南海口中前城守騎營鐵場等堡則卸芝蔴灣新設招練分駐前屯中前中後則應分卸三城第兵馬日有增益難拘見數劉餉司總按新定兵馬數目計派分卸已明無容再議等因具呈撫院咨開見在招練兵

七千三百八十餘員名見支料馬二千七百
十七匹續收六百三十八匹等因到部奉批其
數甚確可據入疏奉此除添設理刑廳官該吏
部議覆外查得招練管兵定二萬名馬定一萬
匹照關門例歲用米十二萬石每歲正二三十
一十二五個月該草一百五十萬束歲該料豆
十四萬四千石該撫疏稱用豆十八萬石猶以
每馬一石五斗計筭昨兩部合

奏經制仍從一石二斗之例矣案查預計五年關

門官兵四萬二百七十二名額派米二十四萬
一千六百三十二石今新定經制止三萬七千
三百七十一名少兵二千九百一名應餘米一
萬七千四百六石預計馬騾駝牛一萬六千五
百匹頭隻額派豆二十三萬七千六百石因馬
多缺額止實買豆十五萬七千六百石如果不
足議折豆八萬石今新定經制馬騾牛一萬六
百十七匹頭隻該料十五萬二千八百八十
四石八斗除議折外實約剩豆四千餘石雖所

餘無幾而前此損之與見在缺額所遺料豆歲亦不下二三萬石該餉司劉孔敬四年十一月內呈稱南寧口倉原貯米豆二十九萬四千五百五十石除令管兵赴倉支領十月十一月間十一月分糧八萬石又除留米豆二萬石以待永平借用又議留貯二萬八千一十七石以待營兵目前支領外共運入鎮城等倉米豆十六萬六千五百三十三石屈指正月以來似有贏餘以待新運本部先于二月中劄令該餉司就

見在兵馬先行通融支用去後今據該撫疏

請再查得津門預計召買五年分有運薊永米五萬石豆十萬石臨期酌量兵馬多少移運薊永以補召買之不足今薊永已允截漕十二萬石則米可移用薊撫又將漕米易銀歲約五萬五千兩作放青馬乾并召買之用則豆亦可酌量移用又津門三年多收東兗二府貯倉豆三萬四千七百石四年六月內撥發薊鎮二萬石尚餘一萬四千七百石亦應撥運關門額草一百五

十萬束俟秋初發銀召買如兵馬及額本色不敷或俟秋成給銀該鎮通折一二月待預計六年如數再計總期衷益通融飽騰有資相應具覆案呈到部該臣等看得招練管簡兵閱馬以資撻伐飽騰之需實當蚤計先該臣部念預計在前召買無及行令該餉司就見在兵馬見在米豆通融措放仍查招練實需本色若干關門實餘本色若干以憑酌議聞今據該撫疏

請米十二萬石草一百五十萬束與關門例合而歲

用豆十八萬石則以一石五斗筭前經制合
奏已仍一石二斗之例則應用豆十四萬四千石
耳查臣部客冬預計疏內原派有薊永米五萬
石豆十萬石今薊州既有截漕八萬石永平截
漕四萬石而薊撫又議以漕米抵銀作料草召
買則全移米五萬石量移豆五萬石而津門存
貯東充餘豆一萬四千七百石亦移運關門為
招練五年之用合諸關門額派剩米一萬七千
四百六十石關門派剩餘豆四千餘石似尚少也

五萬餘石少豆七萬餘石然該鎮兵馬向來之
缺額與前此之損失迄今尚未補完則一月自
有一月之存貯矧目下招練見兵僅七千三百
餘名見馬僅三千三百餘匹又不慮糧料之無
出矣即使兵果盈伍馬果盈廐俟秋成價平時
照前秦兵在寧遠例關門內外通改折一二月
便已充然俟預計六年自可如數派撥緣截漕
虧損京儲召買重累畿民各有成額不便再增
固不得不爲此通融酌濟之法耳至于草束二

百五十萬束秋初發價召買固不煩再計矣迺
若海運到岸卸貯前屯等處照三城兵馬確數
分貯備用仍掛號於關內道給單於關內餉司
支放於前屯等處銷筭於海運廳自當如議飭
行乃該外楊嗣昌又慮一倉官止可收二萬石
湏用十五員一運廳不能分身關內道卽該道
亦不能嘗至前屯身親查覈欲申前

請添設理刑推官一員亦似便計是在銓臣議覆臣
部未敢越俎而譚也既經具題前來相應覆

請恭候

命下臣部移文各該衙門遵奉施行

崇禎五年三月初九日具

題本月十二日奉

聖旨招練本色急需薊永等處米豆果否移用已足
草束俟秋初召買是否目下無悞還著移會該撫
同監視查議明白具奏欽此

覆津撫條陳召買考成疏

題爲蘆運催餉甚急省直解運甚緩謹顯請

嚴勅勒限以儆積玩事專理新餉山東清吏司案呈
崇禎五年三月初九日奉本部送戶科抄出津
部鄭宗周題前事議將保定等府應解遼糧通
計十分爲率俱限三月十五以前完納四分四
月之內共完納八分五月之內通完如或違限
卽以白簡從事少者量罰多則降斥永著爲令
等因開列府分原派米豆并完欠數目具題本

年三月初八日申時奉

聖旨薊遼重鎮需餉甚殷乃派解地方經營各官任意延玩違悞不小著該部嚴行覈議速覆欽此欽遵本日抄出到部送司相應覈議具覆案呈到部該臣等看得津運預計糧料坐派於

畿南六府及山東之東兗二府河南之彰衛二府原欲蚤備預儲以無爽發運之期各府有司非不念切共濟然或延捱日月徐俟秋成以求節省而無如清明開洋重陽停舟海上風信不肯

爲待價者少爽何也且如疏開各府保定已解
米豆一萬九百餘石真定已解米豆七千九百
餘石河間已解米豆九千四百餘石東昌已解
米豆五千七百餘石兗州已解米豆三千餘石
揆諸原派數目雖僅十之一二然亦可見該府
之夙有料理矣若順德廣平大名衛輝彰德等
府顆粒未解何辭違玩似應議罰示懲惟是積
習相仍規限未定姑照折色新餉之例以十分
爲率如津部所議三月內勒完四分四月內勒

完八分五月之內十分通完於六月中驛津
會同督餉御史將各府州縣分別叅劾未完一
分以上住俸督催二分三分以上降俸一級四
分五分以上降職一級六分七分以上降職二
級戴罪催完八分以上革職爲民一如新餉考
成永著爲例臣非不知召買之苦先累民今亦
累官然津部不能以虛舟塞庚癸之呼則有司
自不得不嘔心爲輸輓之謀勢固使然卽欲相
安寬緩而有所不能矣既經具題前來相應覆

請恭候

命下臣部移文各該衙門遵奉施行

崇禎五年三月十一日具

題本月十四日奉

聖旨依議著實行仍著爲例欽此

議覆永運委官高壘等減豁失風米石疏

題爲總報薊永水陸二運事據查覈糧料草束
實數

奏繳并叙在事効勞官員以昭激勸事該本部題
專理新餉山東清吏司案呈崇禎五年二月二
十七日奉本部送戶科抄出督餉御史吳煥題
前事內稱該臣將高壘妻志遠嚴加究訊執稱
委係失風並無別弊臣復弔取督餉部院批准
原詳查驗外該臣看得運官高壘等失風一案

一當永鎮殘破難民流離時迫于接濟事起倉卒

天津無慣運之舡濠河水小海船不可行河故

不得已驟集河船行海一葉之舟欲破巨浪遂

致失風之多當年卽經撫臣翟鳳翀批行道稟

勘核有據臣逐一查核各船戶有名裝載有數

失風有處質証有人撈獲蓬板船木交收有案

拘高壘等嚴行鞫審據有哀鳴若似乎鑿然可

據者臣猶恐未確又復弔申詳部院依准開銷

文卷查對大約當日失風是真非屬假託然漸

海茫茫不比陸行州縣耳目稽查可及好并乘
機冒破事亦有之紙上開列未足盡憑以理度
之雖運船狹小漂沒甚易然或漂于大洋或漂
于沿岸有全失亦必有半失其人間亦有存活
者船米豈無存留多船覆溺何遂至一無撈獲
况隣船質証同舟遇風之口不無扶同未可盡
信軍需顆粒關係豈容乘風呈報如許運官高
壘等既承領運責在典守合照失風漂沒米三
千一百二十石五斗內坐追三分之一應于高

壘名下追米三百四十四石三斗四升汪國
名下追米一百六十八石婁志達名下追米三
百二十六石六斗七升李思誠名下追米二百
一石一斗七升共米一千四十石一斗八升其
餘漂沒者人船俱盡難以問諸水濱且當日以
河船行海特因運至永鎮河小難用大船一時
權宐非盡繇始事之不慎伏乞

聖明垂憐下情

勅下戶部將運官高壘等名下追賠米一千四十石

一斗八升行令天津遼餉道臣嚴追完報其餘
米二千八十石三斗二升照數

俯准開銷并行照例追還脚價則懲前毖後新運自
然振肅情法並行諸弁亦不敢推諉誤事矣等
因本年二月二十六日奉

聖旨該部覈議具奏欽此欽遵抄出到部送司相應
覈覆案呈到部該臣等看得永運創起繇河出
海又欲繇海入河誠恐濼河水小海船難行故
當日以河船而易海船原取其棹運之便也不

虞一葉扁舟難當風濤海中遇颶人船漂沒計
運官高壘等名下共漂失米三千一百二十五
五斗以奸運之隱情度之似未必盡實以颶風
之不曾揣之又未必盡虛此餉臣吳煥所以折
衷情法而坐追三分之一也臣竊謂運弊不可
不肅清而淪胥亦不容不矜憫今既坐高壘等
賠米一千四十石有奇而又照例追還原領脚
價亦足示懲嗣是運官船戶人人惕息諒無敢
以虛報嘗試者矣其餘米二千八十石三斗二

升似當准作開銷以示寬恤者也既經具題前來相應覆

請恭候

命下臣部移文各該衙門遵奉施行

崇禎五年三月十三日具

題本月十五日奉

聖旨始依議欽此

覆晉撫題留裁冗襍項等銀疏

懇爲勦賊需費無措微臣冒死陳言懇乞

聖明稍垂鑒照以收然眉以彌禍亂事新舊兩餉司
案呈崇禎五年三月初三日奉本部送戶科抄
出兵科外抄該山西巡撫宋統殷題前事請留
裁減原額站銀裁減冗員冗役銀并抽扣襍項
等銀十餘萬兩以濟勦賊行糧益萊功賞緣繇
本年三月初一日奉

聖旨該部酌議具覆欽此欽遵分抄到部送司除裁

站銀項該兵部議覆外案查崇禎二年七月
山西巡撫耿如杞具題裁汰冗員冗役俸薪工
食銀二萬一千七百五十七兩二錢一分五釐
內除扣抵

瑞府贍田銀七千八百四十三兩七錢七分尚該
銀一萬三千九百一十三兩四錢四分五釐二
年三年俱經扣抵年例訖四年分銀兩尚未解
部又該省歲該襍項新餉銀六萬有奇二年四
年全完無欠三年分未完襍銀二萬一千一十

五兩九錢今該撫疏

請留用或將三年分未完禱項四年分未解裁冗共
銀三萬四千九百二十餘兩聽其留用相應酌
覆案呈到部該臣等看得晉中流寇時滅時起
近聞又復猖獗荼毒行霍汾沁之間一日未盡
其黨則一日難弛其備而時久費竭搜括輸助
誠不可爲繼者此該撫臣宋統殷所以有議留
裁站汰冗及抽扣禱項之請也第裁站銀兩隸
於兵部各有司存臣部未敢越俎而問卽汰冗

抽扣俱係新舊額餉入數辰下軍興孔棘所
疾呼似難兩顧但三晉爲

國家肩背之區亦當亟圖戡定臣等萬不得已議
將四年分應解汰冗銀一萬三千九百一十餘
兩准頂元二年間壓欠年例并三年分未完襍
項銀二萬一千一十餘兩共三萬四千九百二
十餘兩俱准留用以助行糧鹽菜之需以應同
舟共濟之求是在該撫加意整飭蚤奏蕩平而
已抑臣等又有說焉查

惠桂二藩贍田俱坐派各省州縣而晉中獨取給
於裁汰夫裁汰爲違餉而設者也款項既清名
實未當今似當照各省贍田之例另行坐派其
五年一年該銀七千八百四十餘兩亦姑留爲
剿賊之用以後仍解部充餉可也既經具題前
來相應覆

請恭候

仰下臣部移文該撫遵奉施行

崇禎五年三月十三日具

題本月十五日奉

聖旨錄兩淮照數留用流賊著速行勦定如再老師
糜餉罪責何辭贍田依議照例坐派欽此

考覈關外雷餉司疏

題爲考覈司屬官員事專理新餉山東清吏司案
呈崇禎五年二月初三日奉本部送據原任關
外餉司郎中雷一鳳呈稱本職于崇禎三年十
月二十六日奉差專理寧遠餉務遵于本年十
二月二十六日到任接管放餉自三年十月分
起至四年十月終止舊管郎中王四聰交盤下
存庫銀三千五百七十兩八錢六分八釐二毫
三絲四忽八微任內收過京運月餉米折菹菜

并各管呈繳還官及本職得節積餘共銀一百六十八萬八千五百七十一兩二錢一分二釐九毫六絲九忽放過各管官兵廩餉馬乾并盪菜草束船租米折及各衙門公費工食等項共銀一百六十二萬三千六百五十二兩一錢四分二釐九毫一絲八忽見在存庫餉銀并放剝盪菜川兵月餉共銀六萬八千四百八十九兩九錢三分八釐二毫八絲五忽八微外各管應還官銀自崇禎三年十月至四年七月止俱經

逐月按冊扣除未支惟八九十月奉文扣存銀
三千九百六兩三錢六分九釐各營扣無馬兵
銀自三年十月至四年七月止共三萬九千四
百七十二兩二錢俱准寧前道會取買馬訖惟
八九十月奉文扣存銀一萬三百九十一兩八
錢查扣凌兵無家口餉乾銀內除奉文給黃惟
正三千兩招兵外見存二萬一千八百九十五
兩八錢七分二釐俱逐項交盤與新任郎中韓
謙訖舊管本色米二十五萬九千九百三十四

石九斗五升七合七勺九抄三撮任內據三糧
廳冊報收津運米五十一萬四千二百四十五
石七斗五升二合六勺五抄收京運米折銀三
萬二千兩內除放過川兵米折銀二千五百一
十七兩六錢二釐八毫外發給寧錦二糧廳米
折銀二萬九千四百八十二兩三錢九分七釐
二毫每石照例八錢該折收米三萬六千八百
五十二石九斗九升內每石節省銀二錢計節
省銀七千三百七十兩五錢九分六釐又給秦

昂下夷丁米九百三十四石每石折五錢又節省銀九十三兩四錢貯二廳庫請文動支本職清查交盤冊內米八千二百四十九石五斗二升九合八勺又還官米四千八百九十七石一斗一升二合三勺放過各營兵丁月米授兵行糧共四十七萬二千七百七十石二斗七升七勺六抄四撮見在八城存貯米三十四萬七千二百八十五石三斗九升七合七抄九撮外奉近例扣貯八九十月還官并凌兵無家口半

支米四千一百二十四石六斗七升四合七勺
舊管本色豆三十三萬五千六十三石二斗五
升七合一勺任內據三糧廳冊報收津運豆三
十六萬九千一百三十四石二斗三合七抄本
職清查交出盤冊內豆五百五十五石五斗六
升七合六勺又還官豆二千一百五十一石六
斗六升放過各營馬料并行料共二十二萬五
千七百八十六石九斗七升七合七抄四撮見
在八城存貯豆四十八萬六百八十五石五斗

二升七合九勺九抄六撮外奉近例扣貯八九
十月還官豆四百三十二石一斗八升舊管麥
四百七十一石六斗八升新收麥一百六十石
新收藟一千五百五十五石俱見在逐項造冊
交盤訖計本職自崇禎三年十二月二十六日
接管印務至崇禎四年十二月初二日交代任
內樽節積餘銀一千三十五兩七錢米折內節
省銀共七千四百六十三兩九錢九分六釐扣
貯八九十月各管還官銀三千九百六兩三錢

六分九釐各營無馬兵銀一萬三百九十一
八錢查扣大凌無家口兵馬餉乾銀二萬四千
八百九十五兩八錢七分二釐清查交盤冊內
米八千二百四十九石五斗二升九合八勺豆
五百五十五石五斗六升七合六勺又清查重
冒并還官米四千八百九十七石一斗一升二
合三勺豆二千一百五十一石六斗六升此本
職任內收放扣貯節省本折錢糧之清數也且
經按月造報今當差滿除造冊另報外理合具

呈以備考核伏乞垂照施行等因到部奉批新
餉司查議考核又准寧錦巡撫方一藻咨爲揭
請移咨以便回部考覈事內稱雷餉司任內收
支清徹會計精明且于危疆萬難措手時多方
調劑蠹冒悉絕能使士馬飽騰戎務克濟真經
濟長才緩急堪恃者今差竣回部似應優叙以
勸賢勞等因又准津部翟鳳神咨同前事內稱
關外兵馬雲屯本折最稱浩繁兼以虜犯凌城
援師絡繹措餉尤屬維艱非得才品雙超卓有

幹濟之司屬烏能奏安攘之績今郎中雷一
晶瑩皦爾不泮助勦饒有否晝持籌于帑藏區
詘之日本折支應不窮供餉于干戈倥傯之時
士馬飽騰攸賴計一年之內經收錢糧折色共
一百六十八萬八千五百七十一兩零本色共
八十八萬三千三百七十九石零條分縷晰錙
銖不爽又能仰體時詘極力樽節于支放折色
中省銀一千有奇米折中省銀七千四百有奇
誠司計之偉烈濟時之卓品也茲當差滿回部

之日政其程能課績之時擬合咨叙等因各到
部送司查得雷餉司于三年十二月二十六日
到任至四年十二月初二日交盤與新任韓郎
中接管計任內經手錢糧舊管銀三千五百七
十兩八錢六分八釐新收銀一百六十八萬八
千五百七十一兩二錢一分二釐九毫開除銀
一百六十二萬三千六百五十二兩一錢四分
二釐九毫實在存貯餉銀并放剩鹽菜川兵月
餉共銀六萬八千四百八十九兩九錢三分八

釐零外貯無馬兵丁銀一萬三百九十一兩
錢又凌兵無家口銀二萬一千八百九十五兩
八錢七分二釐又寧錦二糧廳收貯米折節省
銀七千四百六十三兩九錢九分六釐舊管米
二十五萬九千九百三十四石九斗五升七合
七勺九抄零新收津運及部發米折并清查交
盤還官等米共五十六萬四千二百四十五石
三斗八升四合七勺開除米四十七萬二千石
百七十石二斗七升七勺實在米三十五萬

千四百十石七升一合七勺九抄零舊管豆三
十三萬五千六十三石二斗五升七合一勺新
收豆三十七萬一千八百四十一石四斗三升
六勺七抄開除豆二十二萬五千七百八十六
石九斗七升九合實在豆四十八萬一千一百
一十七石七斗八合六勺九抄又麥六百三十
一石六斗八升藟一千五百五十五石俱經查
明相應具題考核案呈到部該臣等看得寧遠
逼近虜穴餉司一差人人却避廼郎中雷一鳳

叱馭直前經風雅而念定嘗庸信果與
無譁當築凌援凌之除兵馬有集本折勞平
嗟措辦無悞急需據其任內出納京運海運
折一釐一顆盡飽軍士之腹不落胥役之囊
如樽節千有餘金誰非茹藥之遺以至節省
折扣除還官萬有餘兩亦出嘔心之笑卽查
無馬乾銀與大凌無家口銀三萬餘兩清出
盤冊內及重冒并還官米豆共一萬三千餘石
雖不過以

公家物力還之

公家然而清省卽是職掌勞怨卽爲靖共本官可謂飲水持籌弄丸應變者矣案查關外餉司前該臣部題奉

欽依一年差滿准照在內新餉司例優陞司道前此管餉各官俱奉有紀錄優擢之

旨伏祈

勅下吏部將餉司雷一鳳照例從優紀錄陞轉
司道庶免遺勞臣益知所勸矣

皇朝通志卷之九

崇禎五年三月十三日具

題本月十五日奉

聖旨是欽此